

–Կ'աղաչեմ, պարոն Կոշէն, կ'ըսէ վեհափառ սուլթանը, սա սահմանագիծը քիչ մը փոխեցէք:

–Անկարելի է, վեհափառ տէր:

–Սահմանագիծ մը փոխել այսչափ դժուա՞ր գործ է. ես օրը երկու նախարար կը փոխեմ:

–Դուք կարող էք, վեհափառ տէր:

–Փոխէ, փոխէ սա սահմանագիծն. ես ալ կ'երակուրէն ետքը նախարարութիւնը կը փոխեմ:

–Չեմ կարող, վեհափառ տէր:

–Քանիմ' պատուանշան կու տամ քեզի:

–Կարելի չէ, վեհափառ տէր: Դուք գիտէք, որ թագուհոյն կառավարութիւնն ո՛րքան կսիրէ ձեր երկիրը, եւ ո՛րքան կաշխատի անոր բարւոյն համար, ուստի շնորհ ըրէք անոր խորհուրդները մտիկ ընելու: Վեհափառ տէր, Եանիան տուէք Յունաստանի, Տուլչինիօս Գարատաղի թողէք. թո՛ղ տուէք Նովի – Պազարն Աւստրիան գրաւէ. այն ատեն գանձը մեր տեսչութեան տակը կ'առնենք. բայց ձայն հանելու չէ՝ երբ Արեւելեան Բումէլին Պուլղարիոյ հետ միանայ: Երբոր գործերն այսպէս կարգադրուին՝ Ներքին Գործոց նախարարութիւնը մենք կը վարենք. Արտաքին Գործոց նախարարութիւնն ալ Ռուսիոյ կ'յանձնենք, եւ կը տեսնէք, թէ երկիրն ո՛րչափ կ'բարենորոգուի: Ձեր վեհափառութեան սիրտն ալ հանգիստ կլինի եւ փորձանքներէ խալսելու համար Դարդանելը մեզի կու տաք, Սեւ ծովու նեղուցն ալ վարպետութեամբ մը Ռուսիոյ զուխը կը փաթտէք եւ հանգիստ սրտով, մաքուր խղճով ձեր վեհափառութիւնը ժամանակ կ'անցունէ իւր կախարդներովը: Այդ երկու նեղուցներն ձեր գլուխն փորձանք են, ջանացէք ուրեմն այդ փորձանքները հեռացնելու: Միւս տէրութիւններն, որք իրենց բաժինը պիտի ունենան այս փորձանքներուն մէջ՝ բնաւ դիտողութիւն չեն ըներ, եւ դուք ալ մտատանջութենէ կ'ազատիք: Ինչո՞ւ կը վախնաք, վեհափառ տէր. տէրութիւններն ո՞չ ապաքէն ձեր ամբողջութիւնն ապահոված են Բերլինի դաշնագրով:

Ասոնք են գրեթէ տէրութիւններուն առաջարկութիւններն, զորս եթէ չընդունենք՝ կ'ըսեն, մեր վրայ մեծ պատասխանատուութիւն պիտի հրաւիրենք եղեր. իսկ եթէ ընդունենք՝ օսմանեան կառավարութեան համար նոր դարագլուխ մը պիտի բացուի եղեր: